

Promoziun dals uffants e Festival da teater

L'Uniun grischuna per il teater popular (UTP) planisescha precautamain il proxim temp. Era sche bleras ideas èn avant maun, ston ins far pass per pass. «Igl è sta in pau pli quiet il davos temp, ma uschespert sco pussaivel vulain nus puspè dar gas», ha il president da la UTP, Alfonso Moser ditg envers la FMR.

MARTIN GABRIEL/FMR

Dapi 2018 è *Alfonso Moser* da Cuira president da l'Uniun grischuna da teater popular (UTP). En ses temp d'uffizi fin qua hai dà circa dus onns tut normals e var dus onns. nua che nagut era sco avant. La pandemia haja chaschunà dapli abdicaziuns da commembers che durant ils onns normals. Alfonso Moser ha dentant er novitads positivas: «En Engjadin'Ota avain nus pudì realisar in champ da teater per giuvenils cun 18 uffants ch'eran participads. Quai è sta in bel success e nus cuntinuassan gugent l'onn 2022 cun tals champs en autras regiuns.»

Cun in bun concept pon ins far teater

«Da principi èsi pussaivel da far emprovas da teater ed er da preschentar ils tocs tenor las prescripziuns federalas e chantunalas actualas», ha il president da la UTP ditg, «jau recumond simplamain da far emprovas da teater be sche tuttas acturas ed acturs èn vaccinads tenor la regla da 2G. Uschiglio na fai gnanc senn da cumenzar.» Er cun il status da 2G

possian ins purtar la mascra da protecziun durant las emprovas. Tar las producciuns na gija quai natiralmain betg: «Là èsi impurtant ch'il public portia consequentamain ina mascra», ha il president da la UTP manegià, «tar la tribuna populara a Cuira ed er en insaquants auters lieus ha quai funcziunà fitg bain l'onn passà.»

Da Tusaun a Samedan

Suenter 30 onns vegn il Festival dal teater popular a bandunar las localitads da la chasa da scola da Tusaun. La UTP è sa decidida d'organisar la stad 2023 ses 1avel festival a Samedan. La stad pon ins tenor Alfonso Moser organisar cun dapli segirezza il festival. «Il program da quest festival vegn a restar pressapauc en il medem rom sco a Tusaun. Nus avessan plaschair da la participaziun d'almain ina furmaziun dal Grischun talian sper las furmaziuns tudestgas e rumantschas.» Il president quinta dal 2023 er cun la participaziun d'ina grupp ospitanta da la Svizra romanda. «Quai fiss propi bel, da far in festival da teater popular cun tuttas quatter linguas naziunalas.»

Tgi è la UTP?

L'Uniun grischuna per il teater popular UTP è vegnida fundada l'onn 1980 a Tusaun. Ella ha blers commembers singuls, ma era 76 uniuns da teater da l'entir Grischun ch'èn commembras. L'uniun tetgala s'engascha dapli varga 40 onns per la promoziun dal teater laic da tuttas trais gruppas linguisticas dal Grischun. In dals puncts culminants en las activitads da la UTP è il festival da teater ch'è vegni organisà per l'emprima giada a Tusaun l'onn 1990. La suprastanza da la UTP ha tschintg commembras e commembers. Tenor ils statuts da la UTP sto almain ina commembra u in commember da la suprastanza esser da lingua rumantscha. Actualmain è quai l'actor da professiun *Lorenzo Polin* da Samedan. (fmr/mg)